

Pfannehouer Fasnacht 2026 Des Kaisers neue Kleider

© Gusti Pollak, www.gustipollak.ch

Es isch emol en grosse grosse Kaiser gsi ime grosse grosse Land, so gross und riich, dass me n ihm au Das Land der unbegrenzten Möglichkeiten gsäit hett. Aber denn sind immer meh Waldbränd cho, und Schneeschtürm und anderi Kataschtophe, au geischtigi, sodass es immer meh ehnder ein Land der begrenzten Unmöglichkeiten gsi isch. Aber de Kaiser hett gliich unbegrenzt gherrscht, au über sini Untertane vom Oschte bis in Wilde Weschte, und bis zu de Halbinsel Flori da im Süde und zum grosslöcherige Grenzwall.

De Kaiser hett zwai Gross-Minischer gha, woner mittene alles gmacht und überwacht hett, zwai mächtigi Kerli, und die hend ame gwaltig um sich gworfe, mit Geld und Wort, de **MUSKelprotz** und de **Schtiifi Bannon**. Ussert anere Ziile ähnlich begabte Helfershelfer - und au Helferinne - hett de Kaiser keini Repräsen-Tante bruucht, au keini Onkel, und kein Senirat, keini Gouverneure und Gouvernante, will e Chinderschtube hetts au nüme bruucht i dem Riich. Defüür hends die iis-chalte Inlandchrieger gha, d ICE.

De Kaiser hett Arnold Trümpi ghaisse, sini Famili isch vor langer langer Ziiit emoll iigwanderet. Und für sin Name überall bekannt z mache, hett er überall Trümp-Eter engangiert, wo soviil bloose hend, wie s hend chöne, und er hett au s gröschi Kunschtmuseum i Arnold Trümpi Museum lo umtaufe, au wenn s dötte kai ainzigs Trümpi und nöd emoll Trumpete gha hett.

De Kaiser hett e groosses Hobby gha, sini Hamschter, unheimlich viil Hamschter, und die hend ame us de Schtaats-Schatulle ghamschteret, was chöne hend, für de Kaiser, aber au für sini Famili und für die beide Gross-Minischer und die andere Lackel, Lackelinne und Lakaie.

Au us allne andere Länder hett er so Hamschter anegfergget, au chliineri Tier, und die sind denn ame i sine Hamschterreder umenandtrumplet, er hett verschidene Grössene gha, und die hett er ame mit sim Zollschock usgmesse, 50-er-Zoll-Redli, 80-ger, 20-er.

Au useme ganz chliine und beschaidene Ländli i de Alpe hett er so Tierli gholt für is Hamscherrad, sibe herzigi Bundes-Müüsli, und hett si mit sim Zollschock usgmesse, jo, Dir gebet mer emol es 39-Zoll-Redli, oder denn wider es 15 Zoll, grad was ihm so in Sinn cho isch in siiner kaiserliche Herrlichkeit. Und die sibe Bundes-Müüsli sind mit de Ziiit eso wore, wie ebe üseri alpine Bundes-Müüsli sind, Müsli-schtille, au da Müsli, wo eigentlich ganz guet englisch chönne hetti.

Zwüschedure hett er denn all die verschidene Hamschterredli loh uf zwai grossi Tafele schribe, und hett denn ame sini Unterschrift dezue gsetzt, und das allne Under- und andere -Tane zeigt:

Lueget emol, wenn Ihr mier en gnueg ticke Filzer gebet, chan ich sogar min Name ohni Fehler schriibe.

Emol sind denn de MUSKelprotz und de Schtiifi Bannon zum Kaiser cho und hett gsait: Los emol, s Fuetter für d Hamschter wird knapp. Weisch wa, mir verchündet im ganze Land, dass dr Kaiser nöii Chlaider überchunnt, damit s allne Untertane au wider besser goht, wunderbari Chleider us Goldfäde, und dezue e Techli-Chrone-Chappe mit de Ufschrift:

Make Arnold Great Again.

Liebi Chinde, da mit de Goldfäde isch en Trick gsi: De MUSKelprotz und de Schtiifi Bannon hend nemlich bhauptet, die richtige Fäde für da Goldige Chleid gebis nu i de Banknote, will da ebe es Sicherhaits-Zeiche segi, und es bruuchi doch niemerts meh Sicherheit als de Kaiser, damit er auch sicher chöni herrsche über sis Riich und für siini sichere Untertane.

Und all die Banknote hends denn schöö uf d Siite glait, für sich selber und all die andere Hamschter. Wenn doch öpperts emoll noogfröget hett, wo denn all da Geld bliibi, hends gseit: Jo ihr hend doch gseh, dass üsere Kaiser nu sone wüeschts lenglichs Regierigsbüro hett ohni en richtige n Egge, so hess-lich, ebe es richtigts AWFUL OFFICE, und es bruuchi jetz en aaschtändige Regierigspalaszt nebezue, ebe en **Ball-Room**, damit de Kaiser au emoll chöni aaschtändig Golf-Bäll schloh bim Regiere.

Und eso hends denn fröhlich glebt, und alli Untertane hend gchlatschet dezue, amel die, wo de Kaiser au emoll gwählt gha hend und jo nüd plötzlich hend chönne sege, da si sich trumpiert hebed mit dere Wahl.

Bis denn plötzlich s Oberschti Gricht vo dem Land ufs Mol verchündet hett:

Jo mir liebed alli üsere Kaiser, und mir möchtet so gern, dass er üs sis wunderbare Zoll-Schtöckli zeigt und erklärt, für wa da guet isch, und au emoll die schöne nöie Chleider, wo so schtrahlend verchündet, wie guet as es üserem ganze Riiseland goht. De MUSKelprotz und de Schtiifi Bannon hend sich churz hinder de n Ohre gchratzet und hend tenkt: Jo so füdliblutt chönd mier de Kaiser au nöd grad zeige, mir münd en nöie Plan ushecke und uf Gruus Social verchünde.

Jo, liebi Chinde, Ihr fröged Öi sicher, wa i dem Plan dinnegsii isch? Ich weiss es au nöd, isch no ganz nöi, und wer weiss, wa de Trümpi no alles usetrümpetelet, und denn chunnts au ganz druufa, was all die Untertane, Repräsen-Tante, Gouverneure und Gouvernante, Hamschter und Müüsli dezue mainet, i dem grosse Land und uf de ganze Welt.

Aber äis isch sicher: Die vo Öi, wo Trumpete schpilet, die chönd jetzt trotz dem Trumpel tröte, so schöö und so luut, wie s wönd !

Und denn: Guet Nacht und schloofet recht guet!

Spenden: Komitee fuer UNICEF Schweiz und Liechtenstein, Pfingstweidstrasse 10, 8005 Zuerich CH39 3000 0001 8000 7211 9

Weil die Kinder unter all den Kriegen am meisten leiden und am wenigsten dafür können.

Pfannehouer Bärner Fasnacht 2026 Die Värse, wo n i mir no mah mache ...

(Das Jahr zur Melodie: "Heute kommt der Weihnachtsmann")

Vo Lausanne, Gänf, bis nach Graubünde / wei si ds Olympia-Füür entzünde //
2038 im ganze Land / lief winterschportlech allerhand // Z Zug, z Züri, z Engelberg, z Lugano / tüe si di Schportereignis' plano //
Das Füür, das brönnti nach und färn, / u d Ablösch-Fiir, die wär de z Bärn.

Wieviil Strom muess KI inveschtiere / für en Antwort uf die Frag z kreiere? /
Wie viil Strom zum Sände, und: / wie viil, bis 's uf mis Chäschtli chunnt? //
"Keine Antwort möglich" heisst s da haschtig / infolge Schtromnetz-Überlaschtig

Für ds öV-Tick, da schalt i ds handy ii, / när click uf d äpp und warte chli, //
click uf d äpp und warte chli, / und warte chli, u nomal chli, //
äntlech! isch ds Billieh uf dr äpp, / u bis denn isch ou dr Böss scho äpp.

Dr Energiepriis "Watt d'Or" isch so smart / drumm hett ne d Schwiz itz "weg-gespart"! //
Är sig am Röschi nümme gnähm / wüll är ne sälber nie berchäm //
Wotts ch öppis nümme, de redsch vo "schpare" / und das begründet jede Schmarre.
Schtatt Nachtzug bis uf Malmö / paar Flüger meh la qualmö //
Schtatt Peschtizid, PFAS und Co kontrolliere / no chli meh Wii subventioniere

Vom Wiener Opereball isch Röschi scho / rächt verhürschet umecho //
Es tüeg ihm zimlech weh im Ranze: / e ganzi Nacht linksume tanze.

(trulladirulla, s'isch halt eso) üsi Schtadt, die isch rot-grünen, u d Ghüderseck blau, /
ds Resultat heisst Container und isch unuffällig grau. //
Dass die chöme, isch sicher, no nid sicher isch, wohi, / und wie fescht die, wo s plane, wider blauäugig si.

Dä Trampelpfad ob em Muribad / gitts leider nümme, o wi schad // wo söll me itz de düregah? / bluttfuess uf schpitzem Grien - aua! //
Obsi z Fuess chasch leider nümme - de muesch halt lehre obsi schwümme.

Im Bärner Bahnhof tüe si boue / und boue si und tüe si boue / und boue si und tüe si boue / si boue, bis si nümme boue /
wäg alte Plän, wo nümme houe: / "eh lue, die längi Leitig, chumm cho gschoue, /
u hie, das überrascht is fescht, / tatsächlech Räschte vo Asbescht!" /
u när d Glaswand gäge Burgerschpittel / d Chöschte schpränge jede Chittel / u ersch dr Tunnel gäge Buebebärg / o Adrian, Du arme Zwärg. //
Was wotts ch no säge da druufabe? / 's si nid alls Hirsche, wo da grabe.

Guete Fründ vo mir, tüechtige Ma, / hett zletscht es heftigs burnout gha / hett für d Chunde gchrampfet Tag und Nacht, /
und hett trotzdem fasch nüüt härebbracht / so schafft me hütt, 's isch nid zum gschpasse, / uf dr Arbeitslosekasse.
Millione Arbeitslosegälder hange dranne, wägere Zahligs-Syschtem-lifüehrigs-Panne / Itz chönnte arbeitslosi IT-Fritze
ihri Kasse unterschütze / und wäre so, wär doch famos, no grad ihres Arbeitslos-sii los

D Schwiz inveschtiert i d USA / Gäld, Guld, Rolex, traritrara // Ou d Kampfjet-Zahlige, die loufe / glii chöi sech die scho Grönland choufe //
Sött Grönland Freiheit düreschtiere / gitts F35 zum Bombardiere. // *Natürlech nume, Tschuldigung, wie d Schwiz, zur Selbstverteidigung!*

Was ds VBS itz ou hett checkt / hett scho 2022 es Buech ufteckt // Hätt d Schwiz das denn zur Kenntnis gnoh / wär dä Jet bim Volk nie dürecho //
Glich muess er düregschtieret sii / zum Schutz vor dr Demokratie - ou, *dasch e Druckfähler*: zum Schutz vo dr Demokratie.
Mi sött ne, tüür, wie mir ne choufe / i Fake 35 umtuufe // Und wo si si itz, d SVP-Dichter, / mit ihrem "Keine fremden Richter"?

Technologisch isch dä Chlapf e Gumpp - so zueverlässig wi dr Trump // Z tüür, z lutt, dr faltsch, es Risiko, / wär hett gloge, wär hett s nid gseh cho, /
im VBS, und ir Regierig? / Dr Nachhall tönt fanatisch, gierig. / Und d Chefin, d Sou-Chefs, wo si ggange / und alli andre hei la hange //
Wär hett sech bi wäm entschuldiget? / wär witterhin dr Grossmacht ghuldiget? // ...

... Und es gäb no so viil andri Sache / alls ehnder truurig, nid zum Lache.

Ja, Dibr Fasnacht- und -nächtlerinne, / meh cha n ig däm Chaos nid abgwinne //
Alli Zeiche schtöh uf Waffe, Chrieger / alli Rügge tüe sech biege /
all die hirnverrückte Sieche / wo meine, was si wichtigs mieche, /
im Kreml und im awful office / wenn isch äch gnue? Scho bald, so hoff i's. /
Bevor de eine mal hett gwunne / und nüüt meh läbt under dr Sonne, /
wüll mir vor lutter Rüschtig schaffe / ke Gält für d Wält hei gha, mir Affe. //

Die Mueh, für mir e Värse druuf z mache, / tünkt mi e Frächheit bi so Sache /
ig hoffe, dass sech d Mönsche bchiime, / und i mög' de wider Värslri riime.